



Na osnovu člana 17. tačka 24. Zakona o Visokom sudskom i tužilačkom vijeću BiH ("Službeni glasnik Bosne i Hercegovine" br: 25/04, 93/05, 48/07 i 15/08) i u skladu sa članom 105. Pravilnika o unutrašnjem sudskom poslovanju ("Službeni glasnik Bosne i Hercegovine" br: 57/08 i 70/09) Visoko sudsko i tužilačko vijeće Bosne i Hercegovine je, na sjednici održanoj 16.12. 2009. godine, donijelo

PRAVILNIK O NAČINU PRISTUPA INTERNETU ZA KORISNIKE PRAVOSUDNOG INFORMACIONOG SISTEMA

Član 1. (Predmet)

Ovim pravilnikom regulira se način ostvarivanja prava pristupa Internetu za korisnike pravosudnog informacionog sistema u sudovima i tužilaštvima u Bosni i Hercegovini.

Član 2. (Pristup Internetu)

- (1) Pravo pristupa Internetu ostvaruju svi korisnici informacionog sistema sa radnih stanica koje su pridružene pravosudnom informacionom sistemu.
- (2) Pristup Internetu se vrši putem pravosudne mreže širokog pojasa i Internet pristupne tačke u centru za obradu i pohranu podataka VSTV-a.
- (3) Za kreiranje funkcionalnog i sigurnog pristupa Internetu od strane svih korisnika pravosudnog informacionog sistema zadužen je Odjel za informaciono-komunikacijsku tehnologiju Sekretarijata Visokog sudskog i tužilačkog vijeća BiH (u daljem tekstu IKT odjel).

Član 3. (Prihvatljiva upotreba Interneta)

- (1) Pristup Internetu je omogućen u slijedeće službene svrhe:
 - a) pristup informacijama i podacima objavljenim na web stranicama ostalih institucija na svim nivoima, pravosudnih institucija drugih država, međunarodnih organizacija i nevladinih organizacija;
 - b) pristup informacijama namijenjenim profesionalnom razvoju, uključujući *on-line* diskusije ili debate;
 - c) pristup web stranicama profesionalnih udruženja, tijelima za edukaciju i ostalim institucijama u svrhu jačanja profesionalnih kapaciteta korisnika;
 - d) pristup informacijama potrebnim za obavljanje administrativnih, finansijskih i tehničkih poslova i poslova iz oblasti IKT-a;
 - e) pristup bazama podataka i spašavanje dokumenata koji su potrebni u svakodnevnom obavljanju poslova;
 - f) postavljanje pitanja iz domena svakodnevnih poslova na internet forumima;

- g) pristup slijedećim globalnim web baziranim sistemima elektronske pošte: Google Gmail, MSN Hotmail i Yahoo Mail. Pristup ostalim web baziranim sistemima elektronske pošte može odobriti šef IKT odjela na individualni zahtjev korisnika.

(2) Upotreba Interneta u privatne svrhe je dozvoljena ukoliko ista ne narušava poslovanje i ugled institucije, te funkcionalnost i sigurnost informacionog sistema.

Član 4. (Neprihvatljiva upotreba Interneta)

- (1) Neprihvatljiva upotreba Interneta podrazumjeva:
- a) korištenje Interneta u suprotnosti sa važećim zakonskim propisima osobito na način koji predstavlja krivično djelo i prekršaj;
 - b) kršenje autorskih prava skidanjem i instaliranjem neautoriziranog softvera i korištenjem neautoriziranih elektronskih dokumenata;
 - c) neovlašteno skidanje softvera, izvršnih datoteka, baza podataka i sličnih tehnologija na radne stanice informacionog sistema;
 - d) narušavanje integriteta informacionog sistema namjernim propagiranjem kompjuterskih virusa, crva i sličnih programa, zagušivanjem Internet saobraćaja, pokušajem zaobilaženja mjera sigurnosti i dodijeljenih prava pristupa i sličnim radnjama;
 - e) korištenje Interneta na način da ometa rad ostalih korisnika, zastrašivanjem ili prikazivanjem teksta ili grafike koja se može smatrati napadnom za ostale korisnike;
 - f) Korištenje interneta u svrhu sticanja profita ili obavljanje javnih aktivnosti koji nisu u vezi sa poslovima radnog mjesta;
 - g) pregledavanje web stranica neprimjerenog, uvredljivog, zastrašujućeg ili opscenog sadržaja;
 - h) pregledavanje web stranica koje pozivaju na mržnju i netoleranciju;
 - i) upražnjavanje on-line igara i kladenja;
 - j) lažno predstavljanje korisnika i institucije na Internetu;
 - k) korištenje chat grupa, socijalnih mreža, instantnih poruka, peer-to-peer dijeljenja datoteka sa osobama i subjektima izvan pravosudnih institucija putem Interneta;
 - l) korištenje online Internet usluga za smještaj i razmjenu podataka;
 - m) prenošenje i objavljivanje povjerljivih informacija, neovlašteno popunjavanje elektronskih anketa usmjerenih na davanje podataka povjerljive ili interne prirode putem Interneta.
- (2) IKT odjel će obavijestiti rukovodioca institucije o svakoj uočenoj neprihvatljivoj upotrebi Interneta od strane korisnika iz te institucije.
- (3) IKT odjel zadržava pravo uvođenja ograničenja pristupa Internetu u cilju suzbijanja neprihvatljive upotrebe Interneta navedene u stavu 1. ovog člana putem za to specijaliziranog softvera.

Član 5. (Praćenje Internet saobraćaja)

- (1) IKT odjel će vršiti praćenje Internet saobraćaja u svrhu upravljanja mrežom i sigurnosti informacionog sistema.

(2) Praćenje uključuje elektronsko evidentiranje Internet stranica kojima pristupa svaki od korisnika ponaosob.

Član 6.

(Zaštita mreže od neovlaštenog upada u informacioni sistem)

(1) IKT odjel će osigurati odgovarajuću zaštitu od neovlaštenog upada između mreže VSTV-a i Internet mreže ili bilo koje druge forme spoljne mreže.

(2) IKT odjel će elektronski evidentirati i kontrolisati pristup ovlaštenih korisnika van informacionog sistema prema lokalnoj računarskoj mreži VSTV-a koja se ostvaruje putem VPN tehnologije ili na drugi dozvoljen način.

Član 7.

(Primjena)

Omogućavanje pristupa Internetu odvijat će se u skladu sa posebnom odlukom Vijeća i to u sljedećim fazama:

- Pilot faza implementacije pristupa Internetu,
- Puna implementacija pristupa Internetu.

Član 8.

(Stupanje na snagu)

Ovaj pravilnik stupa na snagu danom donošenja.

Broj: 09-02-9565-2/09
Sarajevo, 25.12.2009. godine



Predsjednik

Novković